

Oqaluuserisassanut nassuiaat

(Inatsisartut Siulittaasuat)

Inatsisartunut ilaasortaq Eqaluk Høegh, Inuit Ataqatigiit ulloq 17. oktober tungaanut sulinnigiffeqarpoq. Juliane Enoksen Eqaluk Høeghip sulinnigiffeqarnerani sinniisussatut ataatsimiigiaqquneqarpoq.

Qinigaanerup Misilinneqarnissaanut Ataatsimiititaliap Suleriaatsimi § 2 naapertorlugu pinerluuteqarsimasut nalunaarsorsimaffiannit takussutissiaq tunngavigalugu Juliane Enoksenip qinigaasinnaanera misilissimavaa. Misiliineq ingerlanneqartoq Juliane Enoksenip qinigaasinnaanerata nalorngissutigineqarnissaanut pissutissaqalersitsisimangilaq, taamaattumillu ataatsimiititaliap isumaqatigiittup Julianeq Enoksenip qinigaasinnaanerata akuerineqartutut isigineqarnissaa inassutigalugu.

Akerliusoqarnerluni.....?

Juliane Enoksen, tikilluarit, Inatsisartuni inissannut ingissinnaangorputit.

Inatsisartunut ilaasortaq A sii Chemnitz Narup, Inuit Ataqatigiit, Inatsisartunit tunuarnissamik qinnuteqarpoq.

Oqaaseqartoqarniarnerluni.....?

A sii Chemnitz Narup ukiorpassuarni ilaasortatut sulisimaneranut qujassuteqarfigaarput, peqatigitillugu inuttaa ilaquataalu siunissami ajunnginnerpaanik kissaallugit.

A sii Chemnitz Narupip tunuarnerata malitsigisaanik Knud Mathiassen Inatsisartunut aalajangersimasumik ilaasortatut ilaasortannussaaq. Lars-Salik Kielsen Inuit Ataqatigiinnut sinniisussatut nutaatut ataatsimiigiaqquneqarsimavoq.

Qinigaanerup Misilinneqarnissaanut Ataatsimiititaliap Suleriaatsimi § 2 naapertorlugu pinerluuteqarsimasut nalunaarsorsimaffiannit takussutissiaq tunngavigalugu Lars-Salik Kielsenip qinigaasinnaanera misilissimavaa. Misiliineq ingerlanneqartoq Lars-Salik Kielsenip qinigaasinnaanerata nalorngissutigineqarnissaanut pissutissaqalersitsisimangilaq, taamaattumillu ataatsimiititaliap isumaqatigiittup Lars-Salik Kielsenip qinigaasinnaanerata akuerineqartutut isigineqarnissaa inassutigalugu.

Akerliusoqarnerluni.....?

Lars-Salik Kielsen suli Nuummut tikinngilaq. Lars-Salik Kielsenip tikilluaqqunissaa qilanaaraarput.

Oqaluuserisassani immikkoortoq 4, Inatsisartut ataatsimiititaliaannut sinniisoqarfimnullu ilaasortassanik sinniisussaannillu qinersineq (Matoqqasumik ataatsimiinneq), ullumi oqaluuserineqartussaagaluaq kinguartinneqartariaqarpoq, inassuteqaatinik suli utaqqisaqartoqarmat. Oqaluuserinniffissaq nutaaq tassaassaaq ulloq 24. september.

Taasisarnerit pillugit uku akornanni isumaqatigiissuteqartoqarpoq:

Anna Wangenheim, Demokraatit aamma Karl Tobiasen, Siumut.